

靠於此田結收布帛不可不為但此時民間木綿極貴連年收捧民必不堪而以此賀銀則有銀者亦必深藏不售圖得重價不得已依上年例貸出毛營銀四五萬兩約以糧餉酬償以濟臨急之用而待秋成以應收結布作米西運則民間亦免目下收布之苦而且無接待不及之患矣此外各種需用之物令該曹照例分定要以的當磨鍊以除一分之弊宜當 荅曰依啓海防雖曰不緊在我陰雨之備不可少緩似難除防彌牌餘丁木則所當收用然此時督捧亦未妥當此等數款更為議處大臣請依 上教勿罷海防勿捧餘丁布○內醫院請召還前仁城君珙者病內醫 上命使仍留○特命以鄭經世為弘文館副提學李弘胄為都承旨李必榮為黃海監司○夜艮方東方巽方有氣如火光○戶曹啓曰回答使銀一千兩曾有分給三使臣之命矣此銀今已上來而使臣等固辭不受且詔使時一千兩銀子亦甚關重姑勿分給以為補用之地宜當敢啓 荅曰此銀至今不為分給本曹所為殊甚不當矣依前 傳教速為分給○禮葬都監請撤運仁慶宮別殿材木以構山所祭廳 上不許○戊戌侍講院啓曰 王世子以侍病自歲前停講終值大感迄未開筵冲年講學寸陰可惜而廢講之久殆至三箇月事極可悶揆以禮經未葬讀喪禮之義則